

০৩৬

মার্কশীট

এসএসসি পরীক্ষার ফল বেরোবার পর মাসাধিককাল অতিক্রান্ত হয়েছে। কিন্তু রাজবাড়ি মহকুমার কোন কোন স্কুলে এখনো মার্কশীট পৌঁছানি। ফলে, ছাত্ররা কলেজে ভর্তি হতে পারছে না। তারা নিজ নিজ স্কুলে মার্কশীট আনতে গিয়ে ফিরে আসছে। এদিকে বোর্ড কর্তৃপক্ষ কলেজগুলোকে ২১শে আগস্টের মধ্যে ভর্তিপত্র সমাপ্ত করার নির্দেশ দিয়েছেন। কেবল রাজবাড়ি নয়, মার্কশীট না পৌঁছানোর অভিযোগ আরো অনেক স্কুল থেকেই পাওয়া গেছে। স্বভাবতই এটা ছাত্র-ছাত্রী ও তাদের অভিভাবকদের দৃষ্টিচ্যুত কারণ হয়ে দাঁড়িয়েছে। আর ব্যাপারটা আমাদের কাছে বোধগম্যও নয়। মার্কশীট তো ইস্যু করা হয় বোর্ড থেকেই ; ভর্তির শেষ তারিখও বোর্ডই নির্ধারণ করেন। সেক্ষেত্রে বোর্ড যদি একটা নির্দিষ্ট সময়ের মধ্যে মার্কশীট বন্টন সমাপ্ত করতে সক্ষম না হন তাহলে ভর্তির তারিখ বেঁধে দেবারও তো অর্থ থাকতে পারে না। এই অবস্থায় কোন ছাত্র নির্দিষ্ট সময়ের মধ্যে ভর্তি হতে না পারলে তার দায়-দায়িত্ব নিশ্চয়ই তার উপর বর্তাবে না, বর্তাবে খোদ বোর্ডের উপরই। অথচ অবস্থা এমনই দাঁড়িয়েছে যে দায়-দায়িত্ব যারই হোক, ক্ষতি স্বীকার করতে হবে ছাত্রদেরকেই।

এই অবস্থার পরিপ্রেক্ষিতে আমরা মার্কশীট ইস্যু করার কাজটি ত্বরান্বিত করার এবং ভর্তির সময়সীমা বৃদ্ধির জন্য সংশ্লিষ্ট কর্তৃপক্ষের কাছে অনুরোধ জানাই।